

 **Radiotelevizija
Bosne i Hercegovine**

flm

PRAVILNIK
o
unutarnjoj organizaciji
Radiotelevizije Bosne i Hercegovine

Sarajevo, 2007.godine

Na osnovu člana 41. a u vezi sa članom 28. Statuta Radiotelevizije Bosne i Hercegovine, nakon obavljenih konsultacija sa Samostalnim Sindikatom zaposlenika RTV Sistema, Upravni odbor Radiotelevizije Bosne i Hercegovine, na sjednici održanoj _____ 2007. godine donio je

PRAVILNIK

o unutarnoj organizaciji Radiotelevizije Bosne i Hercegovine

I OPĆE ODREDBE

Član 1.

Ovim Pravilnikom uređuje se unutarnja organizacija Radiotelevizije Bosne i Hercegovine (u daljem tekstu: BHRT) utvrđene Statutom BHRT- poglavlje VII.

Član 2.

Uređenje unutarne organizacije ima za cilj stvaranje organizacijskih pretpostavki za:

- funkcioniranje ekonomski i tehnički održive Radiotelevizije Bosne i Hercegovine,
- jedinstveno planiranje i ostvarivanje programske i razvojne politike BHRT kao samostalnog emitera,
- efikasno radno i tehnološko povezivanje radi ostvarivanja utvrđene politike u proizvodnji, obradi, prijenosu i emitiranju programa BHRT,
- racionalno korištenje tehnološko-tehničkih, prostornih, kadrovskih i drugih potencijala kako za potrebe BHRT tako i za potrebe drugih emitera u okviru Javnog RTV sistema BiH,
- zakonito, blagovremeno i efikasno izvršavanje poslova i zadataka s punom angažiranosti uposlenika i maksimalnim korištenjem njihovog stručnog znanja i radnih sposobnosti.

- efikasno rukovođenje, koordinaciju i nadzor nad izvršavanjem poslova i zadataka,
- primjenu savremenih metoda i sredstava rada,
- formiranje troškovnih mjesta na makro i mikro nivou radi efikasnijeg praćenja troškova rada.

II ORGANIZACIJA BHRT

Član 3.

U BHRT se organiziraju slijedeće organizacijske cjeline:

- 1.Sektor Radio BHRT- BHR1
- 2.Sektor Televizija BHRT-BHT1
- 3.Odjel Muzičke produkcije BHRT i
- 4.Uprava / Direkcija generalnog direktora BHRT.

U BHRT se organiziraju i organizacione cjeline čiji su poslovi Zakonom o Javnom RTV sistemu BiH utvrđeni kao djelatnost Korporacije : Sektor RTV produkcije, Sektor PEP-a, Sektor za upravljanje imovinom i investicije i Sektor Zajedničkih funkcija, i isti se organiziraju u BHRT do uspostave svih funkcija Korporacije.

Član 4.

Sektor je temeljna organizacijska cjelina BHRT-a. Poslovi u okviru sektora su grupisani prema važnosti radnog procesa u ostvarivanju zakonske djelatnosti BHRT-a, srodnosti, vrsti, međusobnoj povezanosti i odgovornosti za njihovo izvršenje uvažavajući troškovni aspekt organizacije sektora.

Poslovi u sektorima obavljaju se u okviru užih organizacijskih jedinica: programa i redakcija.

Program je cjelina koja osigurava realizaciju programa određene vrste ili tematike.

Redakcija je programska cjelina koja osigurava realizaciju određene vrste tematskog područja.



Član 5.

Odjel je niža organizacijska cjelina BHRT. Poslovi u okviru odjela Muzičke produkcije BHRT grupisani su prema vrsti, srodnosti i međusobnoj povezanosti ovisno od potreba sektora BHRT-a i javnih servisa Bosne i Hercegovine.

Poslovi Odjela Muzičke produkcije obavljaju se u okviru užih organizacijskih jedinica:odsjeka. Odsjek je radna cjelina u kojoj se obavljaju pretežno isti, istorodni ili slični poslovi.

Član 6.

S ciljem izvršenja osnovne djelatnosti BHRT-a, koordinacije u BHRT-u i koordinacije u okviru sistema javnog emitiranja u Bosni i Hercegovini organizuje se Uprava/Direkcija BHRT.

Poslovi Uprave/Direkcije obavljaju se u okviru užih organizacijskih jedinica:službi.

Služba je radna i tehničko-tehnološka cjelina u kojoj su sadržani poslovi određenog stručnog područja, odnosno radnog procesa.

Član 7.

Za poslove i radne zadatke koji su ograničenog trajanja mogu se formirati i posebna tijela kao što su:timovi, komisije, producenški timovi, koordinacijski timovi i sl.čije zadatke, sastav, uvjete i rokove izvršenja postavljenih ciljeva utvrđuje generalni direktor BHRT.

U cilju unapređenja saradnje i uspostave međuemitterske koordinacije, te u cilju racionalizacije poslovanja, generalni direktor BHRT u dogovoru sa direktorom jednog ili oba javna servisa - članice Javnog RTV sistema BiH može obrazovati međuemitterska radna ili koordinacijska tijela.

III RUKOVODENJE

Član 8.

Rukovodni zaposlenici u BHRT-u su:

- generalni direktor BHRT
- direktori sektora
- urednici programa

- rukovoditelj Muzičke produkcije
- pomoćnici generalnog direktora BHRT.

Član 9.

Rukovodni zaposlenici iz člana 8.ovog Pravilnika imaju prava i odgovornosti utvrđene Zakonom, Statutom BHRT, Medijskim regulatornim pravilima, Uređivačkim načelima Javnog RTV sistema Bosne i Hercegovine, i općim aktima BHRT-a i ugovorima o radu.

Član 10.

Generalni direktor BHRT vrši rukovodnu funkciju, predstavlja i zastupa BHRT.

Prava i obaveze generalnog direktora utvrđene su Zakonom o javnom RTV servisu BiH, Statutom BHRT i Ugovorom o radu.

Generalnog direktora u slučaju odsutnosti ili spriječenosti zamjenjuje jedan od direktora sektora BHRT kojeg on ovlasti.

Član 11.

Direktori sektora BH Radija i BH Televizije u skladu sa Statutom BHRT rukovode sektorima i u izvršavanju rukovodnih i poslovnih funkcija BHRT su članovi Poslovnog odbora BHRT.

Direktori sektora neposredno su odgovorni generalnom direktoru BHRT za jedinstveno, kontinuirano i efikasno funkcioniranje Radija odnosno Televizije BHRT-a.

Direktora sektora u slučaju odsutnosti zamjenjuje urednik programa kojeg on ovlasti, uz prethodnu saglasnost generalnog direktora BHRT.

Član 12.

Urednici programa BHRT u skladu sa Statutom BHRT rukovode programskim cjelinama u okviru Radija i Televizije BHRT, neposredno organizuje obavljanje poslova i obavljaju najsloženije poslove iz djelokruga rada određenog programa kojim rukovode.

U slučaju odsutnosti ili spriječenosti urednika programa zamjenjuje urednik kojeg ovlasti direktor sektora.

Član 13.

Rukovoditelj Muzičke produkcije BHRT u skladu sa Statutom BHRT rukovodi odjelom i neposredno je odgovoran generalnom direktoru BHRT za plansko, efikasno i ekonomično funkcionisanje ovog Odjela BHRT.

U slučaju odustnosti, rukovoditelja Muzičke produkcije zamjenjuje uposlenik kojeg on odredi uz prethodnu saglasnost generalnog direktora.

Član 14.

Pomoćnici generalnog direktora rukovode poslovima u okviru svojih resornih ovlasti i za svoj rad neposredno su odgovorni generalnom direktoru BHRT.

U slučaju odutnosti, pomoćnika generalnog direktora zamjenjuje uposlenik kojeg on odredi, uz prethodnu saglasnost generalnog direktora.

IV UNUTARNJA ORGANIZACIJA

IV-1. Radio BHRT-BHR1

Član 15.

U Radiju BHRT-BHR1 obavljaju se poslovi:

- planiranje programske šeme BHR1,
- koncipiranje, proizvodnja i uređivanje emisija i izvještaja o događajima iz zemlje i svijeta;
- koncipiranje, proizvodnja i uređivanje emisija iz područja kulture, umjetnosti, obrazovanja, muzike, sporta, religije, te razmjena tih programa;
- koncipiranje i priprema programa koji se emitiraju putem satelita, WEB-sajta, teleteksta;
- koncipiranje, pripremanje i vršenje promotivnih aktivnosti, istraživanje tržišta i slušanosti programa i dr.

BHR1 ima slijedeće cjeline/programme:

1. Informativni program;
2. Zabavno -vođeni program;
3. Sportski program i ;
4. Muzički program.

Član 16.

BHR1 ima u okviru Informativnog programa dopisničku redakciju /dopisničku mrežu i dopisništva, u okviru Zabavno-vođenog programa-Redakciju dječijeg programa i u okviru Muzičkog programa Redakciju omladinskog programa i audio dizajna i promocije.

Pored redakcija iz prethodnog stava, BHR1 ima i tri samostalne redakcije:

- redakciju za kulturu, umjetnost i obrazovanje;
- redakciju za dokumentarno dramski program i
- redakciju religijskog programa.

IV-2.TELEVIZIJA BHRT-BHT1

Član 17.

U Televiziji BHRT -BHT1 obavljaju se poslovi:

- koncipiranje, pripremanje i proizvodnja informativnih emisija o događajima, pojavama s područja Bosne i Hercegovine i iz svijeta;
- koncipiranje, pripremanje i uređivanje emisija iz oblasti obrazovanja, kulture, zabave i sporta uključujući i direktne prijenose svjetskih sportskih i kulturnih manifestacija, specijaliziranih programa takmičarskog karaktera, serijala i filmova rađenih samostalno ili u koprodukciji s druga dva javna emitera ili s nezavisnim produkcijama;
- koordinacija, priprema i prezentacija kulturno zabavnih i naučnih, obrazovnih, filmskih i kontakt programa;
- koncipiranje i priprema sadržaja koji se emitiraju putem interneta, teleteksta i drugih savremenih oblika komuniciranja.
- planiranje programske šeme BHT1 i poslovi koordinacije sa sličnim organizacijskim cjelinama javnih RTV servisa BiH;

Član 18.

Televizija BHRT-BHT1 ima slijedeće cjeline/programe:
1. Informativni program (DESK i TTC-i) sa dopisničkom i spoljnom redakcijom;



2. Sportski program

3. Dokumentarno savremeni program sa redakcijom specijalnih programa i redakcijom dokumentarnog programa

4. Revijalni i muzički program sa redakcijom muzičkih programa i redakcijom revijalnih i zabavnih programa

BHT1 ima i samostalne redakcije za : dječiji, omladinski i obrazovni program, redakciju za kulturu, strani program i satelitski program.

Član 19.

U okviru poslova direktora sektora BHRT organizuju se i poslovi programske podrške, produkcije, realizacije programske sheme, programskog arhiva BHT1 kao i administrativno tehnički poslovi.

IV-3. MUZIČKA PRODUKCIJA

Član 20.

Odjel Muzičke produkcije BHRT osigurava djelovanje muzičkih cjelina BHRT (orkestri, ansambli) iz oblasti klasične, zabavne i narodne muzike, izdavanje nosača zvuka i slike, snimanje i arhiviranje muzičkih djela za potrebe programa medija u okviru BHRT i Javnom RTV sistemu BiH i organiziranje muzičkih događaja.

Odjel Muzičke produkcije ima sljedeće cjeline:

1. Odsjek muzički arhiv-fonoteka
2. Odsjek klasične, zabavne i narodne muzike i
3. Odsjek diskografije

Član 21.

U okviru poslova rukovoditelja Odjela Muzičke produkcije organiziraju se poslovi koordinacije muzičkih producenata i administrativno tehničkih poslova odjela.

IV-4 UPRAVA/DIREKCIJA GENERALNOG DIREKTORA BHRT

Član 22.

U okviru Uprave/Direkcije generalnog direktora BHRT obavljaju se poslovi ukupnog rukovođenja BHRT, finansijski, pravno normativni, kadrovski i opći poslovi, poslovi koordiniranja aktivnosti i poslova unutar BHRT-a i Javnom RTV sistemu BiH, poslovi komunikacije (web i teletekst) i odnosi sa javnošću i interna revizija. Pored poslova iz prethodnog stava, u okviru Uprave/Direkcije obavljaju se i poslovi za upravna tijela BHRT i Javnog RTV sistema BiH.

Član 23.

Uprava/Direkcija generalnog direktora BHRT ima slijedeće cjeline:

1. Ured generalnog direktora BHRT;
2. Finansijski poslovi;
3. Pravni, opći poslovi i ljudski resursi i
4. Multimedija i komunikacije.

Član 24.

U okviru poslova Ureda generalnog direktora BHRT obavljaju se poslovi iz djelokruga rada generalnog direktora, pomoćnika generalnog direktora, koordinatora, interne revizije i administrativno tehnički poslovi.

Član 25.

U okviru finansijskih poslova obavljaju se sljedeći poslovi:

- organiziranje, koordiniranje i rukovođenje ekonomsko finansijskim, knjigovodstvenim i komercijalnim poslovima,
- izrada planova, programa i analiza,
- praćenja i analiziranja prihoda od RTV takse i marketinga,
- obavljanje poslova u vezi sa obračunom i naplatom prihoda od korisnika usluga BHRT,
- neposredno učešće u realizaciji ugovora i evidentiranje poslovnih promjena,
- obavljanje poslova nabavke,
- izrada akata za pravilnu primjenu zakona.

 Finansijski poslovi BHRT obavljaju se u okviru službi za:

- finansijske poslove: likvidatura i blagajna
finansijska operativa
knjigovodstvo
- komercijalne poslove: domaće nabavke i magacin
spoljne nabavke
izlazno ulaznih računa
- plan i analizu: planiranje analiza
investicije
- marketing BHRT

Poslovi u okviru Finansija BHRT, a koji čine djelatnost Korporacije, obavljaju se u BHRT do uspostave svih funkcija Korporacije (marketing, spoljne nabavke).

Član 26.

U okviru pravnih i općih poslova i ljudskih resursa BHRT obavljaju se slijedeći poslovi:

-pravni poslovi koji se neposredno obavljaju za potrebe Ureda generalnog direktora BHRT, finaliziranje ugovora BHRT, izrada normativnih akata, zastupanje prema ovlaštenju generalnog direktora BHRT na pravosudnim, upravnim i drugim organima, utuženja potraživanja na zahtjev organizacijskih dijelova BHRT, koordinacija i davanje uputstava i informacija iz pravne oblasti sektorima BHRT, obavljanje imovinsko pravnih poslova BHRT i sl.

-ljudski resursi: analiza stanja ljudskih resursa, projekti i istraživanja u sferi učinkovitosti rada, izrada radno pravnih normativnih akata, ugovora o radu, zastupanja na sudu, zapošljavanja, obuke kadrova i učešće u radu disciplinskih komisija i izrada odgovarajućih akata iz ove oblasti.

-opći poslovi: arhiviranje pisane dokumentacije, prijem i otprema pošte i sl.

U okviru pravnih, općih poslova i ljudskih resursa poslovi se odvijaju u okviru službi za:

- pravne poslove i
- ljudske resurse.

Član 27.

U okviru Multimedije i komunikacija obavljaju se poslovi:

- prikupljanja, obrade, kreiranja i putem Web-stranice plasiranja priloga iz medija u okviru Javnog RTV sistema BiH, te od agencija i drugih medija,
- prikupljanja, obrade, kreiranja i putem teleteksta plasiranja informacija od općeg interesa, servisne informacije, poruke i odgovarajući prilozi iz medija u okviru Javnog RTV sistema BiH, od agencija i drugih medija,
- razvijanje i realizacija sveobuhvatne strategije odnosa sa javnošću, uspostavljanje i održavanje odnosa s medijima, sponzorima, planiranje i vođenje medijske kampanje i pripremanje saopćenja za javnost i dr.
- informiranje uposlenika BHRT,
- iniciranje, u zajednici s drugim emiterima ili samostalno, provođenje istraživanja gledanosti/slušanosti TV i radio programa, te ispitivanje javnog mnjenja.

Poslovi Multimedija i komunikacija obavljaju se u okviru službi za:

- Multimedija
- Komunikacije.

V ZAVRŠNE ODREDBE

Član 28.


Poslovi JS BiH koji se u skladu sa članom 77. Statuta BHRT obavljaju u BHRT, obavljat će se u okviru zatečenih organizacionih cjelina do uspostave svih funkcija Korporacije Javnih RTV servisa BiH i uređuju se Pravilnikom o organizaciji i sistematizaciji radnih mjesta sa KSP sektora RTV produkcije, PEP-a, Upravljanje imovinom i investicija i Zajedničkih funkcija, koj čini sastavni dio ovog Pravilnika.

Član 29.

Sastavni dio ovog Pravilnika čini organizaciona šema BHRT.


Član 30.

Ovaj Pravilnik stupa na snagu osmog dana od dana objavljivanja na oglasnoj ploči u sjedištu BHRT.

Predsjedavajući
Upravnog odbora

Nikola Deretić

Ovaj Pravilnik objavljen je na oglasnoj ploči BHRT dana 23.01. 2008. godine i stupio je na snagu dana 31.01. 2008. godine.

RADIOPOST AVLA BOSNE I HERCEGOVINE



Organizacija prema BHRT

---- Funkcije koje prema Zakonu prelaze u Korporaciju